



**Diepsloot e
amogela
setešene se
sešwa
sa sepodisi**

Tsebe 7



**R7 bilione e
beetswe go aga
mafaratlhatlha
a boemakepe**

Tsebe 11

**E na le
Diphatlhatiro
ka fa Gare**

Dira gore lentšwe la gago le utlwiwe

Ongezwa Manyathi

MaAforika Borwa a a nang le matshwanelo a go tlhopha a na le tšhono e nngwe ya go dirisa tshwanelo ya ona ya molaotseo ka go dira letshwao mo pampiritlhophong kwa Ditlhophong tsa Pusoselegae tsa 2016 tse di tlang.

Ka go dira tlhopho ya bona, maAforika Borwa ga a maatlafatse fela temokerasi ya naga, mme e bile e nna baagi ba ba nang le seabe ka go tlhopha baeteledipele ba ba batlang ba ba tla thusang go tokafatsa boleng jwa matshelo a bona.

Letshwao le le botlhokwa leo la X mo pampiritlhophong le na le seabe sa go rwesa balekgotla ba diwate maikarabelo le go netefatsa gore bommasepala ba boela kwa tshimologong ka go rebola ditirelo.

Gore temokerasi ya naga ya rona e nne maatla, maAforika Borwa a tshwanetse go nna le seabe mo Ditlhophong tsa Pusoselegae tsa 2016.

Go nna le tšhono ya go tlhopha go kaya gore maAforika Borwa a ka dira gore mantšwe a bona a utlwale. Fela se se ka se kgonege fa batho ba sa netefatse gore maina a bona a teng mo lenaneng la batlhophi pele le tswalwa.

Ba ba lekaneng go tlhopha ba tshwanetse go ikwadisa gangwe, ntle le fa ba sa tswa go fuduga kgotsa melerwane ya sedika sa bona sa go tlhophele e fetogile. Se se botlhokwa gonne maAforika Borwa a mantsi ga a itse gore diwate tsa bona di sa tswa go fetoga.

Mo Puong ya gagwe ya Maemo a Setšhaba (SoNA), Moporesitente Jacob Zuma o ikuetse go batlhophi botlhe ba Aforika Borwa go ikwadisetse ditlhopho.

“Ke ikuela go botlhe ba ba nang le matshwanelo a go tlhopha go thologela ka bontsi kwa didikeng le ditešeneeng tsa bona tsa ditlhopho go ikwadisa kgotsa go netefatsa gore dintlha tsa bona di nepagetse, gore ba bo ba siametse tirego e e botlhokwa e ya temokerasi,” a rialo.

Diketeketse di le makgolokgolo tsa maAforika Borwa di ne tsa tsaya tsia kgoeletso e mo bekeng ya ntlha ya go ikwadisetse ditlhopho mo mafelong a beke ka Mopitlwe. Ga jaana Khomishene ya Ditlhopho e e Ikemetseng (IEC) e begile gore mafelo a beke a ikwadiso ya bofelo e tla nna go tloga ka la bo 9 go fitlha ka la bo 10 Moranang 2016.

MaAforika Borwa a feta dimilione di le tharo a ne a etela ditešene tsa ona tsa ditlhopho go ikwadisa, go ikwadisa sešwa kgotsa go fetola dintlha tsa bona.

Monnasetilo wa IEC, Rre Glen Mashinini, o rile palo ya batlhophi ba ba etetseng ditešene tsa ditlhopho e atile go feta gabedi fa go bapisiwa le mafelo a beke a ikwadiso ya Ditlhopho tsa Bommasepala tsa 2011.

Se ke koketsego ya 23% ya ikwadiso fa go ba-

> E tswelela mo go tsebe 2

Pusoselegae e mo diatleng tsa gago!

Ikwadisetse go tlhopha!

9-10 Moranang 2016






REPUBLIC OF SOUTH AFRICA

PUSOSELEGAE

Basadi ba ba tsamaaisang porojeke ya dintlo ba aga magae a a nang le seriti

Rirhandzu Nkombyani

Baagi ba ba nnang mo metseng e e welang ka fa tlase ga Mmasepala wa Mogalakwena e tla bo e le beng ba dintlo tse di nang le seriti mo nakong e e sa fediseng pelo. Palogotlhe ya malapa a le 60 a metse ya Ga-Hlako le Tauetatsoala ka fa tlase ga Mmasepala wa Mogalakwena, Mmasepala wa Sedika wa Waterberg ba tla ungwelwa mo Letsholong la Kago ka Basadi la ngwaga le ngwaga la Lefapha la Manno a Batho la Bosetšhaba. Letsholo la Kago ka Basadi ke Porojeke ya Letsema e maikaelelo a yona e leng go agela ditlhophha tse di senang bokgoni dintlo e leng tsa: batsofe, basadi, batho ba ba nang le bogole le bana. Ke porojeke ya semphato ya Lefapha la Manno a Batho, Basadi ba Aforika Borwa mo Ditirong tsa Kago mmogo le bannaleseabe ba lekala mme e tsholwa ngwaga le ngwaga mo porofenseng e le nngwe kgotsa go feta go keteka Kgwedi ya Basadi. Letsholo la Kago ka Basadi le tlhomilwe ka 2006 mme le setse le agile magae a ka nna 500 go ralala naga fa e sale le tlhongwa. Fa a ne a bua kwa tiragalong ya Letsholo le ya go ribolola lekwete le go aga e e neng e tshwaretswe kwa motseng wa Tauetatsoala, Motlatsatona wa Lefapha la Manno a Batho, Zou Kota-Fredericks, o rile porojeke e e supa gore puso kwa makaleng otlhe a mararo, e ikemiseditse go tlamela maAforika Borwa ka magae a a nang le seriti. “Se se botlhokwa ka Letsholo le ke gore go na le semphato se se bonalang magareng ga puso, leka-la la poraefete le baagi ba ba tsereng matsapa le go neela ka nako ya bona go netefatsa gore porojeke e e atlega,” ga rialo Motlatsatona Kota-Fredericks. Motlatsatona Kota-Fredericks o rile ba a itse gore lefelo la Tauetatsoala le wela ka fa tlase ga Mmasepala o o ntseng o itemogela dikgwetlho dingwe. O netefaleditse baagi gore dikgwetlho tseo di tserwe tsia mme puso e dira ka natla go batla tharabololo. “Ke motlotlo gore metse e mentsi gaufi le Tauetatsoala e na le motlakase le gore batho bangwe ba

ba thusitsweng ke puso ba ikokoantse go dira dikoporasi tse di tlhagisang mae, pampiri ya ntlwana, mesamonyana ya sesadi le dilwana tse dingwe. Mokhuduthamaga (MEC) wa Pusotshwaraganelo, Manno a Batho le Merero ya Setso kwa Limpopo, Makoma Makhurupetje o rile lefapha le ikemiseditse go netefatsa gore basadi ba a maatlafadiwa mme se se bonala ka diporojeke tsa kago tse di abetsweng ditlamo tsa kago tsa basadi fa e sale ka 1994. “Mo ngwageng o o fetileng wa ditšhelete le ono, Limpopo e neetse diporojeke tsa dintlo di le 5 900 go ditlamo tsa kago tsa basadi di le 12 tsa boleng jwa R507 123 551. Boineelo ba rona bo tlhagisiwa ka ditšhono di le mmalwa tsa dintlo tse re di tloletseng baagi. Ditšhono di feta dimilione di le 3.3 di ne tsa tlohlwa ka lenaneo la dintlo le le neng le etleediwa ke puso ka dintlo,” ga rialo MEC Makhurupetje.

GO AGA DINTLO TSE DI NANG LE SERITI

Mongwe wa ba ba amogetseng ntlo ka porojeke e ke Joyce Ramashala (58) wa kwa motseng wa Ga-Hlako ka fa tlase ga Mmasepala wa Mogalakwena. Botshelo bo ne bo le bokete thata mo go Ramashala le ba lelapa la gagwe ba ba ntseng dingwaga tse dintsi mo mokhukhung o o senyegileng wa diphaposi di le pedi. Setlha sa dipula se ne se le bokete thata mo lelapeng le. Fa Motlatsatona Kota-Fredericks le MEC Makhurupetje ba ne ba etela legae la gagwe o ne a retelelwa ke go fitlha boitumelo jwa gagwe. “Ga ke itse gore ke reng. Ke itumetse mo go maswe gore re na le lefelo le re tla le bitsang legae. Ntlo e tla re busetsa seriti sa rona,” a rialo. Mongwe gape yo o agetsweng ke Catherine Moreana (70) yo o nnang le bana ba le supa mo ntlong ya diphaposi di le pedi. Porojeke ya dintlo e fetotse botshelo jwa gagwe le ba lelapa la gagwe.

**Rirhandzu Nkombyani o direla Puso ya Porofense ya Limpopo.*



> E tswelela go tswa mo go tsebe 1

pisiwa le mafelo a beke ya ntlha a ikwadiso ya Ditlhopho tsa Bosetšhaba le tsa Diporofense ka 2014. “Se se supa tokafalo tebang le Ditlhopho tsa Bommasepala tsa 2016 e bile se siametseng le tsa isago,” ga rialo Mashinini. Le fa mafelo a beke a ntlha a ikwadiso ya batlhophi a fetile, go santse go na le nako ya go ka ikwadisa. Ba ba nang le matshwanedi, ba ba iseng ba ikwadise kgotsa ba tlhoka go tlhola dintlha tsa bona, ba ka dira kopo ya ikwadiso ka diura tsa tiro kwa kantorong ya bona ya selegae ya IEC kgotsa go ikwadisetsa go tlhophha mo matsatsing a a kgethegileng a ikwadiso. Ba ba batlang go ikwadisa kwa kantorong ya bona ya selegae ya IEC ba tshwanetse go dira peelano pele ga nako. Se ke ka ntlha ya gore fa naga e atamela Letsatsi la Ditlhopho, badiri ba tsa ditlhopho ba a bo ba se kwa dikantorong, ba tsweletsa matsholo a go ruta setšhaba ka ditlhopho.

BAŠWA BA TSHWANETSE GO

TŠHONO E NNGWE YA GO IKWADISA
O se fetwe ke mafelo a beke a bobedi a go ikwadisetsa Ditlhopho tsa Bommasepala tsa 2016. Diteišene tsa ditlhopho di tla bulelwa ikwadiso go ralala naga go tloga ka ura ya bo 8 phakela go fitlha ka ya bo 5 thapama ka la bo 9 le la bo 10 Moranang 2016.

IKWADISA LE GO TLHOPHA

Jaaka naga e tla bo e gopola dingwaga di le 40 tsa dikhuduego tsa baithuti kwa Soweto, go matshwanedi gore bašwa ba tswe ka makatlanamane go ya go ikwadisa gore ba tlhophe le go nna le seabe mo isagong ya bona. Bašwa ba ga jaana ba tshwanetse go tlhotlhelediwa ke bašwa ba 1976

mme ba tsee kgato mo go netefatseng tshireletso ya isago ya naga. Batho ba bantsi ba ikentshitse setlhabelo gore maAforika Borwa otlhe a kgone go tshela mo nageng e e gololosegileng ya temokerasi. Le fa temokerasi eo e lekiwa gangwe le gape, ga go kae gore ga go tswelelopele e e dirilweng fa e sale ka 1994.

KE MANG YO O KA IKWADISANG?

Gore o ikwadise o tshwanetse go bo o le moagi wa Aforika Borwa; o le dingwaga di le 16 kgotsa go feta (o ka tlhophha fela go simolola o le dingwaga di le 18); o nne le bukana ya boitshupo (ID) ya bakhoutu; karata ya boitshupo; kgotsa setifikheiti sa boitshupo sa nakwana se se maleba (TIC). Badirakopo ba tshwanetse gape go tlamela ka aterese ya kwa ba nnang teng mo sedikeng sa ditlhopho se ba ikwadisang mo go sona. Fa batlhophi ba sena aterese e e tlhomameng, ba tshwanetse go neela batlhankedi ba ditlhopho dintlha tse di malebag tsa kwa ba nnang teng go netefatsa gore ba tlhophha mo sedikeng se se nepagetseng sa ditlhopho.

NKA IKWADISA LENG LE GONA KWA KAE?

O ka dira peelano ya go dira kopo ya ikwadiso mo diureng tsa tiro kwa kantorong ya selegae ya IEC local IEC office ya sedika sa gago sa ditlhopho.

KE TSHWANETSE GO IKWADISA SEŠWA LENG?

O tlhoka go ikwadisa sešwa fa:
• aterese ya gago ya bonno e fetogile
• IEC e go itsise gore melelwane ya sedika sa gago sa ditlhopho e fetogile.

O KA ITSE JANG GORE ANA O IKWADISITSE KGOTSA JANG, LE GORE O IKWADISITSE KAE?

Go lekola dintlha tsa ikwadiso ya gago, o ka:
• romela SMS e e nang le nomoro ya gago ya ID go 32810 (SMS e ja R1.00)
• tlhola dintlha tsa gago tsa ikwadiso mo inthaneteng mo go www.elections.org.za
• tlhola kwa seteišeneng sa gago sa ditlhopho

mo mafelong a beke a ikwadiso (go simolola ka la bo 9 go fitlha ka la bo 10 Moranang 2016) kwa seteišeneng sa ditlhopho
• tlhola kwa kantorong ya IEC ya selegae ka diura tsa tiro.

GO DIRA KOPO YA TLHOPHO E E KGETHEGILENG

Tlhopho e e kgethegile e letla motlhophi yo o ikwadisitseng, yo a ka se kgoneng go tlhophha kwa seteišeneng sa gagwe sa ditlhopho ka Letsatsi la Ditlhopho, go dira kopo ya go tlhophha mo letlheng le le beilweng pele ga Letlha la Ditlhopho. Le fa go le jalo, ga se mongwe le mongwe yo o tshwanelwang ke tlhopho e e kgethegileng. Ba ba batlang go dira kopo ya tlhopho e e kgethegileng, ba tshwanetse go nna le tse di latelang:
• e bo e le motlhophi yo o ikwadisitseng
• a na le bukana ya ID ya bakhoutu; karata ya ID; kgotsa go nna le TIC (dira kopo kwa kantorong ya Lefapha la Merero ya Selegae)
• obamela melawaokamogelo ya tlhopho e e kgethegileng.
O ka dira kopo ya tlhopho e e kgethegileng fa o ka se kgone go ya kwa seteišeneng sa ditlhopho gonne o sa itekanela sentle mo mmeleng, o golofetse kgotsa o le moimana; kgotsa o ka se kgone go tlhophha kwa seteišeneng sa gago sa ditlhopho ka Letsatsi la Ditlhopho.

Tobetsa konopi ya “Like” mo tsebeng ya IEC-SouthAfrica mo go Facebook kgotsa re latele mo go Twitter @IECSouthAfrica go bona tshedimosetso ya sešweng ka ga letlha la go ikwadisa mo matsatsing a bokhutlho jwa beke.

KE TLHOPHA LENG?

Go ya ka molao, ditlhopho tse di kgethegileng di ka dirwa fela ka letlha/matlha a a beilweng mo lenaneong la ditlhopho mme go ka se dirwe diphapogo dipe.

**Motswedi: Khomišene ya Ditlhopho e e Ikemetseng (IEC).*

Go bona tshedimosetso ka botlalo letsetsa IEC mo go 0800 11 8000 fa o na le dipotso tebang le ditlhopho. Tikwatikwe ya megala e bulwa Mosupologo go fitlha ka Labotlhano go tloga ka ura ya bo 7 phakela go fitlha ka ya bo 9 bosigo.

Dimilione di etela diteišene tsa go ikwadisetsa ditlhopho
Priscilla Khumalo

Batlhophi ba feta dimilione di le tharo ba ne ba etela diteišene tsa go ikwadisetsa ditlhopho go ralala naga mo mafelong a beke a ntlha a ikwadiso. Mo bathong ba le 3 097 194 ba ba etetseng diteišene tsa go ikwadisetsa ditlhopho, ba le 692 730 ba bona ba ne ba ikwadisa lantlha, fa ba le 1 086 958 ba ne ba ikwadisa sešwa kwa didikeng tse di farologaneng tsa ditlhopho mme ba le 1 317 506 ba ne ba netefatsa le go fetola dintlha tsa bona tsa ikwadiso kwa didikeng tsa bona tsa ditlhopho. Go ne ga nna gape le tsibogo e kgolo go tswa mo bašweng, ka batho ba le 544 552 ba le kwa tlase ga dingwaga di le 30 ba ne ba ikwadisa lantlha. Palo e e batlileng go ka atumela 54% ya batho ba ba neng ba ikwadisa lekgetlho la ntlha e ne e le basadi. Se se lemogilwe mo diporofenseng tsotlhe ntle le ya Kapa Bokone, kwa batho ba ba neng ba ikwadisa la ntlha e neng e ka nna 50/50 tsa banna le basadi. Bokana ka halofo ya ba ba neng ba ikwadisa la ntlha ba ne ba le kwa Kwa-Zulu-Natal le Gauteng, ka 24% ya ba ba ikwadisang la ntlha kwa KwaZulu-Natal le 22.5% ya ba kwa Gauteng.

Ikwadisetse go tlhopha!



Pusoselegae e mo diatleng tsa gago.

9 -10 Moranang 2016



REPUBLIC OF SOUTH AFRICA

Diepsloot e amogela seteišene se sešwa sa sepodisi

Noluthando Mkhize le Edwin Tshivhidzo

Seteišene sa Sepodisi sa Diepsloot se se neng se letetswe ka matlho a mahibidu kwa bokone jwa Johannesburg, se butswa mme se solofelwa go samagana le bosenyi mo lefelong leo.

Seteišene se, se ne sa bulwa semmuso ke Tona ya Sepodisi, Nkosinathi Nhleko, yo a neng a ikuela go baagi go sireletsa basadi le bana le go dirisa mekgatlho ya selegae ya bopodisi go lwantsha bosenyi mo mafelong a bona.

“Tlhabololo e tla fa go nang le kagiso... Ke maikarabelo gape a setšhaba go netefatsa pabalesego ya sona. Re tshwanetse go dirisana mmogo mo ntweng kgatlhanong le bosenyi,” a rialo

Tona o ne gape a neela seteišene se dijanaga di le 21 tse dišwa go gagamatsa ntwaga kgatlhanong le bosenyi mo lefelong leno.

Puso e dirisitse madi a a fetang R100 milione go aga seteišene se sa sepodisi, se se simolotsweng ka 2008.

Kago ya seteišene e tloletse baagi ba lefelo le ditšhono tsa ditiro di le 145 ba ba neng ba thapiwa jaaka badiri ka kakaretso mme bašwa ba le 200 ba ne ba katisiwa mo makaleng a a farologaneng a kago ka Lenaanekatoloso la Ditiro tsa Setšhaba (EPWP) le Tirelo ya Bosetšhaba ya Bašwa.

GO SIRELETSA BAAGI BA DIEPSLOOT

Mokhomisenara wa Bosetšhaba wa Namaotshwere wa Sepodisi, Molefotenente Mogenerale Johannes Phahlane, o ne a le teng kwa pulong e mme o rile seteišene sa sepodisi se se dirang sentle se botlhokwa mo morafeng mongwe le mongwe.

“Jaaka Tirelo ya Sepodisi sa Aforika Borwa (SAPS), re motlotlo tota gore lo bo lo agetswe lefelo le, gore re kgone go direla le go sireletsa baagi ba Diepsloot sentle le ka nonofo.

“Metswedithuso yotlhe e e tlhomilweng mo seteišeneng se sa sepodisi e tla dirisiwa ka tshwanelo go lwantsha bosenyi ka botlalo,” o ne a rialo.

Molefotenente Mogenerale Phahlane o tlaleleditse ka gore sepodisi se ikarabela mo bathong ba se ba direlang. O supile botlhokwa jwa semphato se se tshwaraganeng gareng ga sepodisi le morafe.

O rile Aforika Borwa e ngoka batho botlhe ba ba farologaneng ba ba tlang ka bontsi mo toropokgolong ya Johannesburg go tokafatsa matshelo a bona.

“Batho ba ba tswang kwa diporofenseng tse dingwe le dinaga tsa boagisani ba tla mo toropokgolong e ya gauta, e leng motswedi wa ikonomi ya Aforika.”

“Diepsloot, fela jaaka mafelo a a mabapi, e tletse mme e bile batho bangwe ba phela ka bosenyi le tiriso e e botlhaswa ya nnotagi le diritibatsi, e leng sengwe se se amanang le polao, maiteko a polao, tshotlo le petelelo.

Ke tshwanetse go gatelela ntlha ya gore re tla samagana le dilo tse ntle le go ikobonya.”

O rile go botlhokwa go samagana le bosenyi, digongwana tsa diritibatsi, bonweenwee le disenyi.

“Re setse re tsere dikgato kgatlhanong le ditokololo tsa rona tse di gogobisang betšhe ya rona e e tlotlegang mo seretseng ka go dira ditiro tse di kgatlhanong nayo e bile re tla tswela go dira jalo. Re ikuela go setšhaba go bega maitshwara a mangwe le a mangwe a a seng mo molaong.”

Jonathan Sathekge, moagi wa Diepsloot, yo a neng a tlile pulong ya semmuso ya seteišene se sa sepodisi, o boleletse Vuk'uzenzele gore o ikutlwa a babalesegile ka ntlha ya fa seteišene se se setse se konoseditswe.

“Re itumelela seteišene se sentšwa se sa sepodisi gonne se mo lefelong la rona mme se, se tla tshosa disenyi,” o ne a rialo.

THEBOLELO YA DITIRELO GO BADIRISI

Fa e sale ka 2014, SAPS e ntse e le mo letsholong la go baakanya le go tokafatsa diteišene tsa sepodisi ka lenaane la Tirelo ya Ditirelo go Badirisi (FSD).

“FSD e tsentswe tirisong ke puso mme e kgweediwa ke Kantoro ya ga Moporesitente go netefatsa gore re tlotla meono ya Batho Pele ka go baya batho kwa pele. Tebang le se, ga re a tokafatsa fela tebego ya dikago tsa rona, mme re katisitse gape le ditokololo tsa rona ka ga go tokafatsa maitsholo a bona fa ba thusa batho ba ba etelang diteišene tsa rona tsa sepodisi,” ga rialo Molefotenente Mogenerale Phahlane.

O tlaleleditse ka gore lenaane leno, le tswelediwa go akaretsa ditirelo tse di manontlho-tlho mo tirelong.

...

Twantsho ya bosenyi le bonweenwee

Dorris Simpson

Moporesitente Jacob Zuma o begile maano a a tla tokafatsang maiteko a ntwaga kgatlhanong le bosenyi le bonweenwee.

Fa a ne a tsibogela dingangisano ka ga Puo ya Maemo a Setšhaba (SoNA), Moporesitente o rile puso e maatlafatsa letlhomiso la melao e bile e tswela ka ditsela tse dingwe tsa go thibela bosenyi le bonweenwee.

“Yuniti ya go Amoga Dithoto e dirile tiro e ntsi e ntle mo ngwageng o o fetileng wa ditšhelete,” o ne a rialo.

Yuniti e, e konoseditse dikgetse tse 463 tsa go amoga dithoto tsa boleng ba R2 bilione e bile e konoseditse gape ditaello tsa go tswalela dithoto di le 342 tsa boleng jwa R2.8 bilione.

“Palogotlhe ya R1.6 bilione e ne ya busediwa batswa-setlhabelo ba bosenyi,” ga rialo Moporesitente Zuma. Madi a, a bonwe morago ga go tlhotlhomisa ditiragalo tsa bonweenwee.

Moporesitente o tlaleleditse ka gore R11 milione e ne ya fitlhelwa mo dikgetseng tsa bonweenwee le ditlolomolao tse dingwe tse batlhankedi ba puso ba neng ba amega mo go tsona.

O rile Molaotlomo o o Fetotsweng wa Ditshenolo tse di Sireleditsweng o ne wa alwa kwa Kokoaanotheomolaong go ya kwa bokhutlong jwa ngwaga o o fetileng.

“Maitlhomomagolo a ona ke go tlamela ka tshireletso go ba ba begang bosenyi gore re kgone go lwantsha bonweenwee mmogo le ka nonofo.

“Molaotlomo o o Fetotsweng wa Thibelo le Twantsho ya Ditiragalo tsa Bonweenwee le ona o tla tlha-

gisiwa kwa Palamenteng,” ga rialo Moporesitente Zuma.

Molaotlomo o, o tokafatsa tiriso ya Molao wa Thibelo le Twantsho ya Ditiragalo tsa Bonweenwee go samagana le dikgwetlho tsa mmatota le go tswala mekhino e e ka tswang e le teng.

Molao o mongwe o mošwa o o tlhangwang ke Molaotlomo wa Bosenyi jwa Inthanete le Merero e e Amanang nabo, o o solofelwang go tlhagisiwa kwa Palamenteng mo seripeng sa ntlha sa 2016.

Bosenyi jwa inthanete bo ka tlhalosiwa e le tiragalo ya bosenyi e e dirwang ka tiriso ya dikhomphiuta le Inthanete.

DITLHABOLOLO MO TIRELONG YA SEPODISI SA AFORIKA BORWA

Re sa le mo dintlheng tsa tshireletso, Moporesitente o begile ditlhabololo tse dišwa mo Tirelong ya Sepodisi sa Aforika Borwa (SAPS).

“Jaaka karolo ya leano la Go boela kwa Tshimologong, Lefapha la Sepodisi le tla tlhoma diyuniti tse di kgethegileng go samagana le diritibatsi le bosenyi jwa boditšhaba mmogo le tirisodikgoka le go tlalatlala ga ditlhabolo mo setšhabeng sa rona.”

Moporesitente o rile diyuniti di le pedi tseno, e leng ya Setheo sa Twantsho ya Diritibatsi sa Aforika Borwa le ya Setheo sa Bosetšhaba sa Taolo ya Ditlhabolo tse di seng mo Molaong le Bosenyi jwa Tirisodikgoka jo bo Setlhogo.

Diyuniti tse di tla bo di le ka fa tlase ga Bokaedi jwa Ditlhotlhomiso tsa Bosenyi jo bo kwa Godimo, jo bo itsegeng jaaka di-Hawk.



Tona ya Sepodisi, Nkosinathi Nhleko (yo o fa gare mo setshwantshong se se fa godimo) le Mokhomisenara wa Bosetšhaba wa Sepodisi wa Namaotshwere Molefotenente Mogenerale Johannes Phahlane ba butse Seteišene sa Sepodisi sa Diepsloot.



“Re bone pharologano. Re nnile le katlego mo diteišeneng tsa FSD tse re setseng re di tlhabolotse kgotsa tse re di butsenseng. Re lemogile phitlhelelo ya ditirelo mo baaging, mafelo a ditirelo a sepodisi a a bothito, go tlhongwa ga dikamano tsa bannaleseabe le dikamano tsa setšhaba tse di maatlafaditsweng.”

Go ya ka Mokhomisenara wa Bosetšhaba wa Sepodisi, ditokololo tsa SAPS tse di tla bong di thusa baagi di tla diragatsa maitsholomantle, tirisanommo go phutlhamana,

mme mmogo, re tshwanetse go tsaya mebila ya rona gore re godise bana ba rona ba e leng baeteledipele ba isago mo Diepsloot e e botoka e bile e babalesegile.”

Tona ya Ditiro tsa Puso, yo le ena a neng a le teng kwa pulong e, o rotloeditse baagi go dirisa mafelo a botlhe ka maikarabelo ka ntlha ya fa a le teng go ba direla.



Puso e itomile sisino go lwantshana le bosenyi le bonweenwee mo nageng.